

PROGRAM FAKULTI CEO UNIMAS KE ARAH KECEMERLANGAN MENYELURUH

November 4, 2016, Friday

The Borneo Post



JADI TUMPUAN: Warga Universiti Malaysia Sarawak memenuhi Dewan DeTAR Putra untuk mendengar Syarahan Perdana Program Fakulti CEO.

KOTA SAMARAHAN: Universiti Malaysia Sarawak (UNIMAS) membawa warganya ke arah kecemerlangan yang menyeluruh menerusi pembelajaran bersifat holistik dalam Program Fakulti CEO (Ketua Pegawai Eksekutif).

Naib Canselor UNIMAS Profesor Datuk Dr Mohamad Kadim Suaidi berkata, Program Fakulti CEO itu diwujudkan bagi memperhebatkan penyertaan daripada sektor swasta dan awam sebagai sebahagian daripada sistem pendidikan tinggi melalui perkongsian pengalaman dan kepakaran tokoh daripada industri dan agensi awam.

“Malah, diharap perkongsian sebegini akan meningkatkan lagi tahap kebolehpasaran graduan kerana ketidaksepadanan antara penawaran dan permintaan daripada perspektif bakal pekerja dan majikan terutama sektor swasta akan dapat dikupas secara penuh efektif serta sistematik,” katanya.

Beliau berkata demikian ketika berucap pada Majlis Perasmian Syarahan Perdana Program Fakulti CEO yang menampilkan Pengarah Urusan Malaysia Airport Holdings Berhad (MAHB) Datuk Badlisham Ghazali di Dewan DeTAR Putra UNIMAS di sini semalam.

“Melalui Program Fakulti CEO ini diharap Yang Berbahagia Datuk Badlisham dapat dijadikan sebagai ikon kepada pelajar UNIMAS dan warganya untuk menambah baik kandungan kurikulum yang ada,” tambah Kadim.

Menurutnya, menerusi program itu juga warga UNIMAS terutama pelajar dapat menimba pengetahuan terus daripada profesional yang terlibat secara langsung dalam pengurusan dunia korporat.

Mengenai UNIMAS, Kadim memberitahu sehingga kini universiti itu mempunyai 18,971 pelajar daripada 42 program akademik di pelbagai peringkat.

Selain itu, katanya, UNIMAS juga telah mewujudkan sembilan Pusat Kecemerlangan di situ dalam memperkasakan bidang penyelidikan.

“UNIMAS turut membangunkan lima institusi iaitu Biodiversiti dan Pemuliharaan Alam Sekitar, Kesihatan dan Perubatan Komuniti, Kajian Borneo, Inovasi dan Reka Bentuk Perindustrian serta Informasi Sosial dan Inovasi Teknologi,” ujarnya.

Dalam syarahan yang dihadiri lebih 2,000 pelajar dan warga UNIMAS itu, Badlisham berkongsi pengalamannya sebagai antara ahli korporat yang berjaya di negara ini dalam merajui dan membawa MAHB di mata dunia.

Beliau memberitahu, MAHB sedia memberi peluang kepada UNIMAS untuk menjalin kerjasama atau sebagainya pada masa akan datang demi memberi manfaat khususnya kepada pelajar.